



Na osnovu člana 17. stav 2. i člana 44. stav 1. Zakona o Visokom sudskom i tužilačkom vijeću Bosne i Hercegovine („Službeni glasnik Bosne i Hercegovine”, br. 25/04, 93/05, 48/07, 15/08, 63/23, 9/24 i 50/24), a u vezi sa članom 61a. i 62. Poslovnika Visokog sudskog i tužilačkog vijeća Bosne i Hercegovine („Službeni glasnik Bosne i Hercegovine“, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24, 27/24 i 72/24), Visoko sudsko i tužilačko vijeće Bosne i Hercegovine (u daljem tekstu: Vijeće), u sastavu, tužilac Sanin Bogunić, predsjednik Vijeća, sudija Velimir Ninković i Sanela Gorušanović - Butigan, potpredsjednici Vijeća, te sudija Izo Tankić, sutkinja Aleksandra Obradović, tužiteljica Snježana Petković, sudija Sedin Idrizović, tužilac Saša Sarajlić, prof. dr. Džamna Vranić, advokatica mr Duška Bogojević, advokat dr. sc Davor Martinović, tužiteljica Željka Fabić i advokatica Elma Veledar Arifagić, na sjednici održanoj 19. i 20.03.2025. godine, donijelo je

RJEŠENJE

o imenovanju zamjenika glavnog tužioca Kantonalnog tužilaštva Kantona 10 - Livno

- I. Za zamjenika glavnog tužioca Kantonalnog tužilaštva Kantona 10 - Livno imenuje se **Stojanović Mladen** na mandat od pet (5) godina.
- II. Datum stupanja na dužnost imenovanog Vijeće će odrediti posebnom odlukom.

Obrazloženje

Na osnovu člana 36. Zakona o Visokom sudskom i tužilačkom vijeću Bosne i Hercegovine (u daljem tekstu: Zakon o VSTV-u BiH) i člana 33. i 34. Poslovnika Visokog sudskog i tužilačkog vijeća Bosne i Hercegovine (u daljem tekstu: Poslovnik VSTV-a BiH), Vijeće je na internet stranici dana 07.11.2024. godine objavilo javni konkurs pod brojem: 04-07-3-4035-1/2024, kojim je oglašena 1 (jedna) pozicija zamjenika glavnog tužioca Kantonalnog tužilaštva Kantona 10 - Livno.

Nakon provedene konkursne procedure, nadležno podvijeće je u skladu sa članom 59b. st. (1), (2) i (4), a u vezi sa članom 61a. Poslovnika VSTV-a BiH izvršilo finalno rangiranje kandidata, te je Vijeću dostavilo rang listu kandidata sa obrazloženim prijedlogom za postupanje.

Razmatrajući zaključenu rang listu kandidata i utvrđeni broj bodova, kao rezultat ocjenjivanja svih kriterija propisanih Zakonom o VSTV-u BiH i Poslovníkom VSTV-a BiH, Vijeće je odlučilo da za poziciju zamjenika glavnog tužioca Kantonalnog tužilaštva Kantona 10 - Livno imenuje kandidata na rang listi pod rednim brojem 2 Stojanović Mladena, aktuelnog zamjenika glavnog tužioca Kantonalnog tužilaštva Kantona 10 - Livno, koji navedenu dužnost obavlja od 01.12.2019. godine.

Prethodno imenovanju na poziciju zamjenika glavnog tužioca navedenog tužilaštva, imenovani kandidat je u periodu od 2002. g. do 2019. g. obavljao dužnost tužioca u Kantonalnom tužilaštvu Kantona 10 - Livno. U periodu od 2001. g. do 2002. g. obavljao je dužnost ministra pravosuđa i uprave u Vladi Kantona 10 - Livno, a u periodu od 1991. g. do 2001. g. obavljao je poslove finansijskog inspektora i zamjenika predsjednika komisije za porezne prekršaje u Poreskoj upravi Federacije BiH.

Vijeće je nakon ocjene stručnosti kandidata, sposobnosti pravne analize, komunikativnosti i sposobnosti prezentacije, sposobnosti kandidata da odgovorno, nezavisno i nepristrasno obavlja funkciju tužioca, uzimajući u obzir, između ostalog, dosadašnje radno iskustvo kandidata, profesionalnu nepristrasnost i ugled, ponašanje van posla, edukaciju i usavršavanje, objavljivanje stručnih i naučnih radova, te druge

aktivnosti u struci, rukovodne vještine i iskustvo, sposobnost upravljanja ljudskim potencijalima i ocjene kriterija podobnosti, ocijenilo da imenovani kandidat u potpunosti ispunjava uslove za imenovanje propisane u članu 43. Zakona o Visokom sudskom i tužilačkom vijeću Bosne i Hercegovine.

Kada je u pitanju broj ostvarenih bodova, Vijeće je imalo u vidu da je imenovani kandidat u toku konkursne procedure, u pogledu bodova za kriterij stručnosti i sposobnosti pravne analize ostvario ukupno 86 bodova od mogućih 100 bodova, dok je na razgovoru pred nadležnom komisijom Vijeća u pogledu drugih kriterija ostvario ukupno 27,9 od mogućih 30 bodova, što ga je u konačnici rangiralo na drugo mjesto rang liste kandidata sa ukupno ostvarenih 113,9 boda od mogućih 130 bodova.

Kriteriji stručnosti i sposobnosti pravne analize imenovanog kandidata, koji je nosilac pravosudne funkcije, utvrđeni su na osnovu ocjene rada za posljednje tri godine za koje je ocijenjen, i to za 2021. g., 2022. g. i 2023. g., a računajući do dana isteka roka za podnošenje prijave po navedenom konkursu.

Na osnovu ocjena rada za 2021. g., 2022. g. i 2023. g., odnosno ocjena 4, 5 i 3, utvrđeno je da je imenovani kandidat za navedene tri godine za koje je ocijenjen ostvario prosjek od 4. Prema odredbama člana 56. stav 2. Poslovnika VSTV-a BiH, njegovoj prosječnoj ocjeni rada za prethodne tri godine koja iznosi 4 dodijeljen je ekvivalentan broj bodova koji se koristi u konkursnoj proceduri od 86 bodova.

Ostali kriteriji, koji se odnose na sposobnost kandidata da odgovorno, nezavisno i nepristrasno obavlja funkciju za koju se prijavio, profesionalne nepristranosti i ugleda, te ponašanja van posla, dosadašnjeg radnog iskustva kandidata, edukacije i usavršavanja, objavljivanja stručnih i naučnih radova, te drugih aktivnosti u struci, komunikativnosti, rukovodne vještine i iskustvo, te sposobnost upravljanja ljudskim potencijalima, utvrđeni su na razgovoru pred nadležnom komisijom Vijeća, kojom prilikom je svaki član komisije nezavisno bodovao kriterije, kako je to propisano u čl. 54., 54c., 54d., 54e. i 54f. Poslovnika VSTV-a BiH, pri čemu je kandidat po tom osnovu u konačnici ostvario ukupno 27,9 bodova. Konačan broj bodova koje kandidat ostvari na razgovoru predstavlja prosjek zbira ocjena po kriterijima koji se ocjenjuju na razgovoru.

Pored ukupnog broja ostvarenih bodova, na osnovu kojih je kandidat u skladu sa čl. 59a. stav (2) tačka a) Poslovnika VSTV-a BiH stekao uvjete za predlaganje i imenovanje na poziciju zamjenika glavnog tužioca kantonalnog tužilaštva, Vijeće je vodilo računa o okolnostima koje su relevantne za procjenu podobnosti iz člana 48a. Poslovnika VSTV-a BiH, ocijenivši da ne postoje okolnosti koje izazivaju sumnju u pogledu podobnosti kandidata za poziciju za koju se prijavio.

Shodno odredbama člana 62. stav (2) Poslovnika VSTV-a BiH, Vijeće je u odnosu na kandidata sa rang liste pod rednim brojem 1 dalo prednost kandidatu na rang listi pod rednim brojem 2 Stojanović Mladenu iz slijedećih razloga:

Vijeće je prije svega cijeno da je kandidat sa rang liste pod rednim brojem 1, kao i imenovani kandidat u toku konkursne procedure po kriterijumima koji se primjenjuju prilikom ocjene uspjeha postignutog u konkursnoj proceduri, kako u pogledu kriterijuma koji se ocjenjuju na osnovu ocjene rada kandidata u prethodnom relevantnom periodu ili na osnovu kvalifikacionog i pismenog testiranja, tako i u pogledu kriterijuma koji se ocjenjuju na razgovoru sa kandidatima, ostvarili potreban uspjeh za imenovanje na poziciju zamjenika glavnog tužioca kantonalnog tužilaštva. Dakle, oba navedena kandidata su u skladu sa odredbama člana 59a. stav (2) tačka a) i člana 59b. stav (2) i (4) Poslovnika VSTV-a BiH, a u vezi sa članom 61. i 61a. istog poslovnika stekli uslove za predlaganje i imenovanje na poziciju zamjenika glavnog tužioca Kantonalnog tužilaštva Kantona 10 - Livno.

Obzirom na činjenicu da je imenovani kandidat ostvario manji broj bodova (113,90 bodova) od kandidata na rang listi pod rednim brojem 1 koji je ostvario ukupno 117,90 bodova, Vijeće je zaključilo da je takav položaj kandidata na rang listi posljedica male razlike u ukupno ostvarenim bodovima (4 boda), koja u konkretnom slučaju ne ukazuje na stvarnu razliku u kvaliteti u korist kandidata pod rednim brojem 1 sa rang liste.

Pored navedenog, Vijeće je uzelo u obzir činjenicu da je imenovani kandidat na razgovoru sa članovima Komisije za obavljanje razgovora, na kojem se razmatralo i vrednovalo sposobnost kandidata da odgovorno, nezavisno i nepristrasno obavlja funkciju za koju se prijavio, profesionalne nepristrasnosti i ugleda, te ponašanja van posla, dosadašnjeg radnog iskustva kandidata, edukacije i usavršavanja, objavljivanja stručnih i naučnih radova, te drugih aktivnosti u struci, komunikativnosti, rukovodne vještine i iskustvo, te sposobnost upravljanja ljudskim potencijalima, ostavio dojam da se radi o kandidatu od kojeg se, u konkretnom slučaju u većoj mjeri može očekivati da će uspješno, stručno i savjesno obavljati dužnost zamjenika glavnog tužioca u Kantonalnom tužilaštvu Kantona 10 - Livno.

Osnov za takvu tvrdnju temelji se na činjenici da je imenovanom kandidatu u odnosu na kandidata na rang listi pod rednim brojem 1 na razgovoru pred nadležnom Komisijom Vijeća dodijeljen veći broj bodova, posebno za kriterije koji se odnose na rukovodne vještine i iskustvo, te sposobnost upravljanja ljudskim potencijalima.

Imenovani kandidat je kroz razgovor iskazao veoma dobre kompetencije. Potpuno razumije ulogu i namjeru institucije u ostvarivanju državnih strateških prioriteta i utjecaj tih prioriteta na vlastito područje rada. Svjestan je područja odgovornosti i ima jasne planove i ciljeve. Kroz primjere iz prakse koje je izložio tokom razgovora vidljivo je da posjeduje sposobnost preuzimanja odgovornosti za postizanje ciljeva unutar svog područja odgovornosti, održava i poboljšava radni učinak, fokusirajući se na prioritete, držeći druge odgovornima za rezultate rada. Ima bogato tužilačko iskustvo, sposoban je donositi blagovremene i ispravne odluke unutar kolektiva.

Dakle, neposredan kontakt sa imenovanim kandidatom pred nadležnom Komisijom Vijeća, pokazao je na strani imenovanog kandidata prednost u odnosu na prvorangiranog kandidata, posebno kada su u pitanju rukovodne vještine i iskustvo, te sposobnost upravljanja ljudskim potencijalima. U tom kontekstu cijenjena je i činjenica da je imenovani kandidat u prethodnom mandatu obavljajući dužnost zamjenika glavnog tužioca Kantonalnog tužilaštva Kantona 10 - Livno, pokazao visok stepen vještine rukovođenja i organizovanja rada, kao i sposobnost upravljanja ljudskim potencijalima.

Uzimajući u obzir sve navedeno, Vijeće je ocijenilo da imenovani kandidat u potpunosti ispunjava zakonom propisane uslove, kao i druge kriterije koji se cijene prilikom izbora kandidata, kako bi bio imenovan na poziciju zamjenika glavnog tužioca Kantonalnog tužilaštva Kantona 10 - Livno.

Kandidat se na dužnost zamjenika glavnog tužioca, u skladu sa članom 31. stav (2) Zakona o VSTV-u BiH imenuje na mandat od 5 (pet) godina.

U pogledu dijela rješenja o stupanju na dužnost imenovanog, isto se odgađa do okončanja dodatne provjere iz člana 86c. Zakona o VSTV-u BiH, a u vezi sa članom 19. stav (3) Pravilnika Visokog sudskog i tužilačkog vijeća Bosne i Hercegovine u vezi s izvještavanjem o imovini i interesima („Službeni glasnik BiH“ br. 20/24 i 57/24), odnosno do okončanja upravnog spora ukoliko je pokrenut protiv rješenja o imenovanju.

Ovo rješenje će biti objavljeno na internet stranici Vijeća, shodno članu 44. stav (1) Zakona i članu 62. stav (4) Poslovnika VSTV-a BiH, uz naznaku datuma objave od kojeg počinje teći rok za podnošenje tužbe.

Imajući u vidu sve iznesene razloge, Vijeće je odlučilo kao u izreci ovog rješenja.

Pouka o pravnom lijeku: Protiv ovog rješenja može se pokrenuti upravni spor pred Sudom Bosne i Hercegovine u roku od osam dana od dana objavljivanja rješenja o imenovanju na internet stranici Vijeća.

Broj: 04-07-3-1186-1/2025
Datum: 20.03.2025. godine

